

四庫全書

史部

欽定四庫全書

欽定外藩蒙古回部王公表傳卷之九十九

傳第八十三

輝特扎薩克一等台吉達瑪璘列傳

達瑪璘輝特人姓伊克明安其始祖曰扎巴甘
墨爾根有子烏達納諾顏十傳至鄂羅哩克和
碩齊子三長達什次濟木巴次鄂木布達什子
色布騰色布騰子班珠爾班珠爾子二長即達

瑪璘次曼濟早死其子以達瑪璘嗣絕襲所遺
扎薩克濟木巴裔別授扎薩克台吉自有傳鄂
木布裔授間散台吉不設扎薩克初輝特為杜
爾伯特屬杜爾伯特游牧額爾齊斯輝特游牧
塔爾巴哈台地相鄰且互姻杜爾伯特長車凌
以女妻達瑪璘準噶爾亂達瑪璘攜孥遠徙踈屬
奔赴額琳哈畢爾噶附綽囉斯台吉噶爾藏多
爾濟以故杜爾伯特族內徙達瑪璘不獲從車

凌至乾隆二十年大軍征達瓦齊車凌以所部
從次額琳哈畢爾噶達瑪璘屬戶四十餘從噶
爾歲多爾濟乞降定邊右副將軍薩拉爾諭俟
定準噶爾徐議安置既而達瓦齊就擒

賜杜爾伯特諸台吉游牧地達瑪璘間之間道至烏
里雅蘇台携戶六十餘請內徙隸車凌牧

詔授扎薩克一等台吉

賜幣其從衆編佐領如杜爾伯特諸台吉例附車凌

牧復

諭給糧贍其衆令無失生計四十一年達瑪璘來朝

扈

蹕木蘭行圍

優賚遣歸中道疾卒無嗣從子布爾布達爾濟襲

一次襲布爾布達爾濟達瑪璘弟曼濟之子幼

為哈薩克所掠留處者十餘載聞達瑪璘內附

乘間自哈薩克遁歸伊犁

上聞之

詔給達瑪璘乾隆四十一年襲扎薩克一等台吉四

十七年

詔世襲罔替

輝特扎薩克一等台吉羅卜藏列傳

羅卜藏輝特人姓伊克明安扎薩克台吉達瑪璘從祖其祖濟木巴為鄂羅哩克和碩齊次子見達瑪璘傳濟木巴子卓齊巴有子一即羅卜

藏乾隆二十年大軍定準噶爾羅卜藏率屬請

內附

詔隸杜爾伯特汗車凌牧授扎薩克一等台吉二十
一年羅卜藏將入

覲道卒子衮布襲

一次襲衮布羅卜藏子乾隆二十年從父來歸
二十一年襲扎薩克一等台吉二十二年大軍
勦準噶爾竄黨有額爾克騰者準噶爾二十四

鄂拓克之一也既降尋叛謀竄俄羅斯有不從者
二人中道脫歸至車凌所以告車凌以其一械
送科布多軍以一給袞布為導令率兵六十往
勦袞布馳踰阿爾台遇賊于杭愛海圖擒斬其
男俘妻女歸無脫者

獎賜茶幣四十七年

詔世襲固替

欽定外藩蒙古回部王公表傳卷之九十九

欽定四庫全書

欽定外藩蒙古回部王公表傳卷之一百

傳第八十四

土爾扈特部總傳

土爾扈特部分牧而處以新舊別稱舊土爾扈特
為烏訥恩蘇珠克圖盟設扎薩克十新土爾扈特
為青色特啟勒圖盟設扎薩克二別有游牧額濟
內河扎薩克一亦稱舊土爾扈特以先來歸故自

為盟然實本同族其始祖曰翁罕翁罕子阿爾薩
蘭阿爾薩蘭子阿穆瑚朗阿穆瑚朗子克依邦克
依邦子素賽素賽子巴雅爾巴雅爾子瑪哈齊蒙
克瑪哈齊蒙克子二長貝果鄂爾勒克次翁貴貝
果鄂爾勒克子四曰珠勒扎幹鄂爾勒克曰衛袞
察布察齊曰保蘭阿噶勒琥曰莽海珠勒扎幹鄂
爾勒克子一曰和鄂爾勒克為舊土爾扈特部祖
衛袞察布察齊子一曰額濟內泰什為新土爾扈

特部祖翁貴及保蘭阿噶勒琥莽海裔皆游牧青海別設扎薩克四詳青海厄魯特部傳和鄂爾勒克六傳至渥巴錫偕額濟內泰什五世孫舍稜等自額濟勒河來歸稱其祖自和鄂爾勒克而上凡再世皆單傳蓋以地與世絕遠莫能自詳其族初土爾扈特部為四衛拉特之一衛拉特諸酋以伊犁為會宗地然各統所部不相屬準噶爾稍強有巴圖爾琿台吉者游牧阿爾台侮諸衛拉特土爾

扈特酋和鄂爾勒克惡之挈族走俄羅斯屯牧額濟勒河倚騰吉思巨澤所居地曰瑪努托海北界俄羅斯南界哈薩克東界哈喇哈爾榜西界圖里雅斯科以鄰牧互市皮馬俄羅斯嘗與雪西洋及西費雅斯科戰土爾扈特以兵助之厥後稍就弱俄羅斯因稱為已屬土爾扈特習蒙古俗務畜牧逐水草徙分置諸鄂拓克以台吉宰桑等轄之不類俄羅斯城郭處而繒罽衣冠與諸衛拉特復絕

殊和鄂爾勒克子六長書庫爾岱青次伊勒登諾
顏次羅卜藏諾顏其他皆無嗣故不著順治十二
年書庫爾岱青遣使錫喇布鄂木布奉表貢十三
年伊勒登諾顏遣使錫喇尼和碩齊繼至十四年
羅卜藏諾顏及子多爾濟遣使沙克錫布特達爾
漢烏巴什阿巴賴等貢駝馬二百餘復携馬千乞
市歸化城

允之書庫爾岱青子朋楚克朋楚克子阿玉奇世為土爾

扈特長阿玉奇始自稱汗康熙二十四年定四衛
拉特貢例使入關以二百人為額

諭阿玉奇知之詳杜爾伯特部傳先是書庫爾岱青以
巴圖爾琿台吉女為子朋楚克婦生阿玉奇育巴
圖爾琿台吉所和鄂爾勒克徙牧不獲携時土爾
扈特與準噶爾隙然未絕後書庫爾岱青赴唐古
特還道假準噶爾索阿玉奇以歸阿玉奇有女兄
弟二長適喀爾喀之墨爾根汗額列克次適和碩

特之車臣汗鄂齊爾圖鄂齊爾圖復以其女為阿
玉奇長子沙克都爾扎布婦額列克孫察琿多爾
濟亦以其女妻鄂齊爾圖孫羅卜藏衮布阿喇布
坦察琿多爾濟即喀爾喀之土謝圖汗也噶爾丹
為阿玉奇舅氏始以鄂齊爾圖孫女阿努為妻既
而惡鄂齊爾圖襲殺之復以兵侵喀爾喀察琿多
爾濟不敵挈部內附有偉宰桑恭格鄂欽車布登
三都布者其祖母族也從至請視喀爾喀諸台吉

例貢

觀

允之鄂齊爾圖既滅其妻奔土爾扈特依弟阿玉奇而處
阿努有女弟曰阿海噶爾丹兄子策妄阿喇布坦
將以為妻噶爾丹奪取之策妄阿喇布坦怨徙博
囉塔拉乞婚阿玉奇阿玉奇以女妻之其第三子
散扎布率屬戶萬五千餘徙往有哈薩克頭克汗
者要諸道散扎布奮擊之乃達博囉塔拉蓋凡阿

玉奇婚戚皆噶爾丹讐噶爾丹嘗遣人至青海語
和碩特台吉達什巴圖爾等收所部回人流徙者
勿令奔土爾扈特及策妄阿喇布坦收三十五年
噶爾丹為大軍所敗遁走阿玉奇聞之遣宰桑多
爾濟扎布以所部兵千防諸阿爾台之土魯圖策
妄阿喇布坦復遣散扎布携兵二萬往會唐古特
部第巴比噶爾丹陰阻之還三十六年噶爾丹竄
死阿玉奇屬諾顏和碩齊色布騰蒙克等從策妄

阿喇布坦使入貢慶捷

優賚遣歸三十八年阿玉奇復遣使額里克遜等奉表貢
歸經準噶爾為所戕蓋自噶爾丹既滅策妄阿喇
布坦謀并諸衛拉特族留散扎布不遣阿玉奇索
其子乃逐散扎布歸額濟勒仍留從戶不之給分
隸準噶爾鄂拓克阿玉奇固索不獲因構難從子
阿喇布珠爾嘗假道赴唐古特久之乃還值準噶
爾道梗乞內屬

允之即游牧額濟內河一旗也五十一年阿玉奇使薩木
坦等假俄羅斯道達

京師表貢方物

上嘉其誠且欲悉所部疆域

遣侍讀圖麗琛等齎

敕往是年夏啟行秋達俄羅斯地俄羅斯故導我使紆道
行五十三年始至薩喇托付蓋土爾扈特與俄羅斯
斯界也所部使遠道迎將抵瑪努托海阿玉奇復

遣台吉宰桑等導至拂廬我使授

敕宣

諭訖語之曰阿喇布珠爾已

賜爵優養欲遣歸爾牧以策妄阿喇布坦惡爾恐戕之而
詭以哈薩克哈喇哈爾榜為辭也爾若欲令阿喇
布珠爾歸當自俄羅斯來迎阿玉奇曰我雖外夷
然冠服與中國同俄羅斯乃嗜欲不通言語不同
之區也若以往來數故不假道則我無由入貢中

國矣阿喇布珠爾荷

厚恩與歸土爾扈特等復何疑慮鄂齊爾圖妻聞我使至
泣告所部未破時嘗往來納貢狀阿玉奇妻達爾
瑪巴拉子沙克都爾扎布及阿喇布珠爾父納扎
爾瑪穆特等各贈馬及方物我使以越境無私交
辭阿玉奇待之有隆禮留旬餘筵宴不絕復附表
奏謝五十四年春圖麗琛等復

命退而著異域錄詳述其風土情狀焉是年策妄阿喇布

坦掠哈密我使敗之有曼濟者被擒訴土爾扈特
屬留處準噶爾為宰桑等虐思附

天朝或歸故土但不獲間耳

上憫之

諭策妄阿喇布坦遣土爾扈特屬歸牧不從雍正七年
上以準噶爾匿青海叛賊羅卜藏丹津將討罪

遣諭土爾扈特甫就道準噶爾使至請獻羅卜藏丹津
詔大軍暫緩進復

諭土爾扈特知之九年台吉多爾濟遣使阿爾巴圖沙喇
布丹津等至奏請往謁達賴喇嘛時唐古特阿爾
布巴等亂初定達賴喇嘛徙噶達

詔守汛者勿遣赴唐古特以其使至噶達優給糧糗比歸
頒賜茶幣等物多爾濟者納扎爾瑪穆特長子也乾隆二
十一年所部使吹扎布等入

覲稱奉其汗敦囉布喇什令道假俄羅斯三載乃至請
赴唐古特謁達賴喇嘛

賜宴萬樹園

遣官護往唐古特敦囉布喇什為沙克都爾扎布子即
始封扎薩克汗渥巴錫父也二十二年使自唐古
特還

旨詢所部牧域及棄準噶爾附俄羅斯故使者言曰聞
土爾扈特部舊偕四衛拉特聚伊犁迄策妄阿喇
布坦時阿玉奇與交惡挈族由哈薩克取明噶特
衆屯牧額濟勒河俄羅斯謂為其屬然附之非降

之也非

大皇帝有命安肯自為人臣僕時哈薩克汗阿布賚內
附子登努勒蘇爾統鄰牧土爾扈特吹扎布聞其
表使將至言曰哈薩克為

天朝臣僕若

諭令由所部納貢無紆道慮幸甚因述所居疆域繪獻
詔遣歸

頒賜敦囉布喇什幣物而是時族台吉巴圖爾烏巴什

及舍稜等以附牧準噶爾乘阿睦爾撒納叛擾伊犁境巴圖爾烏巴什為大軍所逼走死舍稜詭乞降竄俄羅斯尋歸土爾扈特牧三十六年汗渥巴錫挈全部歸順舍稜從之抵伊犁將軍伊勒圖以聞

上察其內附誠

詔渥巴錫舍稜等入

覲先是土爾扈特與準噶爾絕準噶爾別以輝特為四

衛拉特之一大軍定準噶爾四衛拉特自杜爾伯特外悉以叛就滅土爾扈特道遠雖修貢未內屬上不欲勤遠略索舍稜不獲仍聽之乃全部以不召至蓋自

國初綏服蒙古以來至是乃盡其族而臣之

御製土爾扈特全部歸順詩以誌事

序曰伊犁將軍伊勒圖等奏土爾扈特汗渥巴錫及其台吉策伯克多爾濟並舍稜等率其部衆三萬餘戶

來歸先期遣使至伊犁具書通款自言為阿玉奇汗正
系向居俄羅斯地久願為大皇帝臣僕而無機可乘
乃於去冬謀棄舊游牧挈屬內附因自彼逸出行程
萬千有餘里閱半年餘始抵卡倫乞准令入覲以伸
積誠渥巴錫等亦先後來至伊犁察其詞意懇切郵
函以聞先是安泰奏偵知土爾扈特部內附信即遣
額駙色布騰巴爾珠爾往迎之令即諭其偕渥巴錫
等至山莊朝謁而舒赫德亦先所命由烏什馳往莅

其事者因令代伊勒圖為將軍駐伊犁安輯新附之
衆給以餼贍振其乏也授之牧地資其生也其汗及
台吉宰桑至者將賜宴賚封爵秩而其部衆則量地
分編以居聯其情亦渙其勢也蓋土爾扈特自入俄
羅斯遠阻聲教越今幾六七十年乾隆丙子秋其汗
敦囉布喇什雖曾使人入貢第宴而遣之茲乃不藉
招致全部內屬誠有不期然而然者且準噶爾自底
定以來築城安屯無異中國郡縣今土爾扈特復隸

我藩屬于是四衛拉特之衆盡撫而有之可謂盛矣
然余履泰持盈之念彌以是為兢兢序而系之以詩
紀實也

詩曰土爾扈特部昔汗阿玉哥今來渥巴錫明背俄羅
斯向化非招致頒恩應博施舍稜逃復返彼亦合無
辭衛拉特相忌携孥往海濱終焉懷故土遂爾棄殊
倫弗受將為盜俾安皆我民從今蒙古類無一不王
臣

駕幸木蘭次伊綿峪渥巴錫等至

召覲行幄

親以蒙古語垂詢俾伸悃狀

賜章服易所被繒罽伊綿峪舊名布祜圖昂阿前以受
綽羅斯台吉噶爾藏多爾濟等朝

詔賜名義取會歸也已而哈薩克布魯特使皆迎謁其
地至是復受渥巴錫等朝

御製詩紀之有類已全歸衆蒙古峪徵嘉兆信伊綿之

句

旋蹕避暑山莊

賜宴萬樹園及溥仁寺

命設燈宴觀火戲

優賚白金文綺諸珍器有差

諭曰土爾扈特台吉等以俄羅斯風氣迥殊且奔走疆場不遑休息因慕我國尊崇黃教及撫御降番仁化誠心歸順跋涉遠道甚屬可嘉自當錫予封爵以

示渥澤

詔分新舊二部各設扎薩克曰烏訥恩蘇珠克圖舊土
爾扈特以渥巴錫領之稱汗如故諸台吉授親王
郡王貝勒貝子公一等台吉有差曰青色特啟勒
圖新土爾扈特以舍稜領之封郡王別授貝子一
復

命工圖其形藏

武成殿時布達拉廟落成

上以所部素崇黃教

詔往瞻禮與法會

御製土爾扈特全部歸順記曰始逆命而終徠服謂之
歸降弗加征而自臣屬謂之歸順若今之土爾扈特
携全部捨異域投誠嚮化跋涉萬里而來是歸順非
歸降也西域既定興屯種于伊犁薄賦稅于回部若
哈薩克若布魯特俾為外圉而羈縻之若安集延若
巴達克山益稱遠徼而驟置之知足不辱知止不殆

朕意亦如是而已矣豈其盡

天所覆至于海隅必欲悉主悉臣為我僕屬哉而茲土爾
扈特之歸順則實

天與人歸有不期然而然者故不可以不記土爾扈特者
準噶爾四衛拉特之一其詳已見于準噶爾全部紀
略之文溯厥始率亦荒略弗可考後因其汗阿玉奇
與策妄不睦竄歸俄羅斯俄羅斯居之額濟勒之地
康熙年間我

皇祖聖祖仁皇帝嘗欲悉其領要令侍讀圖麗琛等假道俄羅斯以往而俄羅斯故為紆繞其程凡行三年又數月始返命今之汗渥巴錫者即阿玉奇之曾孫也以俄羅斯征調師旅不息近且徵其子入質而俄羅斯又屬別教非黃教故與合族台吉密謀挈全部投中國興黃教之地以息肩焉自去歲十一月啟行由額濟勒厯哈薩克繞巴勒喀什諾爾戈壁于今歲六月杪始至伊犁之沙拉伯勒界凡八月厯萬有餘里

先是朕聞有土爾扈特來歸之信慮伊犁將軍伊勒圖一人不能經理得宜時舒赫德以叅贊居烏什辦回部事因命就近前往而畏事者乃以新來中有舍稜其人曾以計誘害我副都統唐喀祿因以竄投俄羅斯者恐其有說計議論沸起古云受降如受敵朕亦不能不為之少惑而略為備焉然熟計舍稜一人豈能聳動渥巴錫等全部且俄羅斯亦大國也彼既背棄而來又擾我大國邊界進退無據彼將焉往是

則歸順之事十之九詭計之伏什之一耳既而果然而舒赫德至伊犁一切安汎設偵籌儲密備之事無不悉妥故新投之人一至如歸且掄其應入覲者由驛而來朕即命隨圍觀獵且于山莊燕賚如杜爾伯特車凌等之例焉夫此山莊乃我

皇祖所建以柔遠人之地而宴賚車凌等之後遂平定西域茲不數年間又于無意中不因招致而有土爾扈特全部歸順之事自斯凡屬蒙古之族無不為我大

清國之臣

神御咫尺有不以操先券閱後成愜

志而愉快者乎予小子所以仰答

祖恩益凜

天寵惴惴焉孜孜焉惟恐意或滿而力或弛念茲在茲遑
敢自詡為誠所感與德所致哉或又以為不宜受俄
羅斯叛臣虞啟邊釁蓋舍稜即我之叛臣歸俄羅斯
者何嘗不一再索取而俄羅斯訖未與我也今既來

歸卽以此語折俄羅斯彼亦將無辭以對且數萬之食之人既至近界驅之使去彼不刦掠畜牧將何以生雖有堅壁清野之說不知伊犁甫築新城而諸色人皆賴耕牧為活是壁亦不易堅而野亦不可清也夫明知人以嚮化而來而我以畏事而止且反致寇甚無謂也其衆涉遠歷久力甚疲矣視其之死而惜費勿救仁人君子所不忍為况體

天御世之大君乎發帑出畜力為優恤則已命司事之臣

茲不贅記記事之緣起如右舊傳土爾扈特部自阿
玉奇汗始徙牧俄羅斯雖所部使亦以是為辭至
是渥巴錫等來朝

上詢所部顛末奏阿玉奇曾祖曰和鄂爾勒克與巴圖
爾琿台吉修怨徙牧俄羅斯之額濟勒河迄阿玉
奇已越四傳

上以傳聞異辭

御製土爾扈特部紀略記其始祖所自出並

証前之失精覈而未實者尋

遣渥巴錫等歸伊犁

御製優恤土爾扈特部衆記曰歸降歸順之不同既明則歸順歸降之甲乙可定蓋戰而勝人不如不戰而勝人之為盡美也降而來歸不如順而來歸之為盡善也然則歸順者較歸降者之宜優恤不亦宜乎土爾扈特歸順源委已見前記茲記所以優恤之者方其渡額濟勒而來也戶凡三萬三千有奇口十六萬

九千有奇其至伊犁者僅以半計夫以遠人嚮化携
孥挈屬而來其意甚誠而其阽危求息狀亦甚憊既
撫而納之苟弗為之贍其生猶弗納也贍之而弗為
之計長久猶弗贍也故自聞其來及其始至以迫于
今惟此七萬餘衆凍餒疴瘠之形時懸于目而惻于
心凡宵旰所究圖郵函所諮訪無暇無輟乃得悉其
大要于是為之口給以食人授之衣分地安居使就
米穀而資耕牧則以屬之伊犁將軍舒赫德出我牧

羣之孳息驅往供饋則以屬之張家口都統常青發帑運茶市羊及裘則以屬之陝甘總督吳達善而嘉峪關外董視經理則以屬之西安巡撫文綬惟時諸臣以次馳牘入告于伊犁塔爾巴哈台之察哈爾厄魯特凡市得馬牛羊九萬五千五百其自達哩剛愛商都達布遜牧羣運往者又十有四萬而哈密闢展所市之三萬不與焉撥官茶二萬餘封出屯庾米麥四萬一千餘石而初至伊犁賑贍之茶米不與焉甘

肅邊內外暨回部諸城購羊裘五萬一千餘襲布六萬一千餘疋棉五萬九千餘斤氈廬四百餘具而給庫貯之氈棉衣什布幅不與焉計費儲用帑銀二十萬兩而賞貸路貲及宴次賚予不與焉其台吉渥巴錫等之入覲者乘傳給餼而來至則錫封爵備恩禮其往也復慮其身之生不宜內地氣候則命由邊外各臺歷巴里坤以行而迎及送並遣大臣侍衛等護視之用以柔懷遠人俾毋致失所或有以為優恤太

甚者蓋意出于鄙吝未習聞國家

成憲毋惑乎其見之隘也昔我

皇祖聖祖仁皇帝時喀爾喀土謝圖汗等為厄魯特所殘

破率全部十萬衆來歸

皇祖矜其窮阨

命尚書阿喇尼等往撫之發歸化城張家獨石口倉儲以

賑其乏且足其食又

敕內大臣費揚古明珠等齎白金茶布以給其用採買生

畜以資其生遂皆安居得所循法度樂休養迄今八十餘年畜牧日以蕃生殖日以盛樂樂利利殷阜十倍于初其汗王台吉等世延爵祿恪守藩衛一如內扎薩克之效臣僕長子孫莫不感戴

聖祖德澤及人之深得以長享昇平之福也朕惟體

皇祖之心為心法

皇祖之事為事惟茲土爾扈特之來其窮阨殆無異曩時之喀爾喀故所以為之籌畫無弗詳賙惠無少靳優

而恤之且計長久庸距知謀之勞而費之鉅乎冀茲
土爾扈特之衆亦能如喀爾喀之安居循法勤畜牧
務生殖勿替厥志則其世延爵祿長享昇平之福又
何以異于今之喀爾喀哉用是臚舉大凡勒石熱河
及伊犁俾土爾扈特汗全部衆咸識朕意且以詔自
今以往我諸臣之董其事者三十七年

賜諸扎薩克牧地曰齋爾曰和博克薩哩以塔爾巴哈
台大臣轄之曰濟爾哈朗以庫爾喀喇烏蘇大臣

轄之曰晶河以伊犁將軍兼轄之曰布勒罕河以喀喇沙爾大臣轄之統聽伊犁將軍節制四十八年

詔設舊土爾扈特盟長四副盟長三新土爾扈特正副盟長各一所部旗十有三爵如之游牧額濟內河舊土爾扈特扎薩克多羅貝勒一由貝子晉襲烏諾恩蘇珠克圖舊土爾扈特分四路曰南北東西南路扎薩克卓哩克圖汗一扎薩克巴雅爾圖貝

子一扎薩克輔國公一扎薩克一等台吉一北路
扎薩克布延圖親王一公品級扎薩克一等台吉
一扎薩克一等台吉一東路扎薩克畢錫呼勒圖
郡王一扎薩克伊特格勒貝子一西路扎薩克濟
爾哈朗貝勒一青色特啟勒圖新土爾扈特分二
翼左翼扎薩克弼哩克圖郡王一右翼扎薩克烏
察喇勒圖貝子一

欽定外藩蒙古回部王公表傳卷之一百

欽定四庫全書

史部

欽定外藩蒙古回部表傳卷一百一十七

主事_臣陳若霖覆校

總校官編修_臣倉聖脉

欽定四庫全書

欽定外藩蒙古回部王公表傳卷之一百一

傳第八十五

固山貝子阿喇布珠爾列傳

今襲扎薩克多羅貝勒

阿喇布珠爾土爾扈特人其五世祖曰書庫爾岱
青子四長固魯次達什次朋楚克固魯達什皆嗣
絕次納木策稜生納扎爾瑪穆特子四長多爾濟
次即阿喇布珠爾餘皆無嗣多爾濟裔別設扎薩

克二朋楚克裔別設扎薩克七統隸烏訥恩蘇珠
克圖舊土爾扈特部自有傳初納扎爾瑪穆特從
其汗阿玉奇游牧額濟勒河地逼俄羅斯及準噶
爾阿喇布珠爾嘗假道準噶爾赴唐古特謁達賴
喇嘛已而阿玉奇與策妄阿喇布坦修怨康熙四
十三年阿喇布珠爾自唐古特還以準噶爾道梗
留嘉峪關外遣使至

京師請內屬

上憫其窮無所歸

賜牧色爾騰

詔封固山貝子轄從衆五十二年

遣使齎

敕往諭阿玉奇令迎阿喇布珠爾歸使至阿玉奇及納扎爾瑪穆特以阿喇布珠爾幸為

天朝臣僕且俄羅斯假道不易請勿遣歸五十四年準噶爾掠哈密境

詔阿喇布珠爾備兵聽調會準噶爾敗于哈密遁走議撤

噶斯防禦兵以色爾騰牧通噶斯之察罕齊老圖

遣侍衛往偵準噶爾蹤五十五年阿喇布珠爾奏請從軍

効力

詔率兵五百駐噶斯防準噶爾謀尋卒子丹忠襲

一次襲丹忠阿喇布珠爾長子初襲固山貝子雍

正七年來朝

詔晉封多羅貝勒九年準噶爾遣謀煽喀爾喀及內附之

厄魯特復以兵分掠諸牧有墨爾根綽爾濟者丹忠屬也叛附之丹忠懼準噶爾掠乞內徙署陝西總督查郎阿令携戚屬游牧阿拉克山阿勒坦特卜什等處準噶爾尋叛遁丹忠徙牧額濟內河十年以鄂爾多斯諸扎薩克私易赴調兵論罪

詔檄丹忠知之令偕諸扎薩克協力備賊乾隆五年卒子羅卜藏達爾扎襲

二次襲羅卜藏達爾扎丹忠長子乾隆五年襲多

羅貝勒以幼

遣理藩院官代理牧務十七年撤還十八年

詔授扎薩克領其衆未幾以羅卜藏達爾扎不更事仍遣官代理二十四年理藩院奏羅卜藏達爾扎漸習牧務屬衆咸守法請撤還代理官

允之三十二年卒子旺扎勒車稜襲

三次襲旺扎勒車稜羅卜藏達爾扎長子乾隆三十二年襲扎薩克多羅貝勒四十八年

詔世襲罔替

欽定外藩蒙古回部王公表傳卷之一百一

欽定四庫全書

欽定外藩蒙古回部王公表傳卷之一百二

傳第八十六

扎薩克卓哩克圖汗渥巴錫列傳

渥巴錫土爾扈特人阿玉奇汗曾孫阿玉奇汗父
曰朋楚克見總傳朋楚克子三長即阿玉奇子八
次伊克扎木素次諾爾布扎木素皆無嗣阿玉奇
子自沙克都爾扎布袞扎布外餘皆無嗣沙克都

爾扎布子十三曰敦囉布喇什為渥巴錫父曰巴圖其裔別為二扎薩克詳貝子額默根烏巴什傳曰多爾濟喇什其裔別為一扎薩克見台吉伯爾哈什哈傳曰布蘇爾們子阿喇克巴為閑散台吉餘無嗣或留牧額濟勒河故不著衮扎布裔別為三扎薩克詳親王策伯克多爾濟傳敦囉布喇什子四長巴克克庫次薩賴次扣庫皆早死無嗣渥巴錫其季也土爾扈特自阿玉奇始稱汗三傳至

渥巴錫號勿絕乾隆三十六年挈所部自額濟勒
河至請內附昆弟子姓皆從之入

覲

詔仍稱汗

賜號卓哩克圖授扎薩克

賞三眼孔雀翎黃馬褂及

御厯馬黃纓尋

遣歸三十七年

賜牧齋爾

遣三等侍衛阿思哈往護視三十九年阿思哈受代還
先是土爾扈特內附渥巴錫獻七寶刀及金錯刀
稱其曾祖阿玉奇自洪豁爾得之洪豁爾界鄰俄
羅斯在哈薩克西北自昔未通中國故不隸職方
產精鐵及良馬阿玉奇游牧額濟勒河嘗往來洪
豁爾因得其刀以為佩令子孫世守之渥巴錫獻
且告世為

天朝臣僕繼自今無甲兵患也至是復函是义及匕首
各一乞阿思哈齎貢

上嘉其誠後先所獻物各

製詩紀之是年渥巴錫卒

諭曰渥巴錫自歸誠以來感激朕恩諸事俱極恭順辨
理游牧事宜頗為盡心邇聞患病朕意不過偶疾可
冀速痊今遽溘逝深為軫惜所有渥巴錫汗爵號著
令其長子策琳納木扎勒承襲

一次襲策琳納木扎勒渥巴錫長子乾隆三十九年襲扎薩克卓哩克圖汗四十年定齋爾牧為舊土爾扈特部南路以策琳納木扎勒領之

詔授盟長

賜扎薩克及盟長印四十八年

詔世襲罔替

扎薩克固山巴雅爾圖貝子額默根烏巴什列傳
額默根烏巴什土爾扈特人扎薩克卓哩克圖汗

渥巴錫從弟父巴圖子二長唐阿特子一即額默根烏巴什次喀木齊克子拜濟呼授扎薩克輔國公別有傳乾隆三十六年額默根烏巴什從渥巴錫來歸

詔封固山貝子

賜號巴雅爾圖授扎薩克尋卒子恭坦襲

一次襲恭坦額默根烏巴什長子乾隆三十七年襲扎薩克固山巴雅爾圖貝子

賜牧齋爾四十年

詔授副盟長轄南路中翼旗務

賜扎薩克印四十八年

詔世襲罔替

扎薩克輔國公拜濟瑚列傳

拜濟瑚土爾扈特人扎薩克卓哩克圖汗渥巴錫

從子父喀木齊克子一即拜濟瑚乾隆三十六年

從渥巴錫來歸

詔封輔國公授扎薩克三十七年

賜牧齋爾

詔轄南路右翼旗務

賜扎薩克印四十八年

詔世襲罔替

扎薩克一等台吉伯爾哈什哈列傳

伯爾哈什哈土爾扈特人扎薩克卓哩克圖汗渥
巴錫從弟父多爾濟喇什子三長即伯爾哈什哈

次博羅授開散一等台吉次濟布濟特早死無嗣
乾隆三十六年伯爾哈什哈從渥巴錫來歸

詔授扎薩克一等台吉三十七年

賜牧齋爾四十年

詔轄南路左翼旗務

賜扎薩克印四十七年卒初伯爾哈什哈無嗣以從弟
阿喇克之子鄂齊爾為子後自生子二長納木扎
勒喇什次扎勒阿至是議襲爵

詔以納木扎勒喇什襲

一次襲納木扎勒喇什伯爾哈什哈長子乾隆四十七年襲扎薩克一等台吉四十八年

詔世襲罔替

扎薩克和碩布延圖親王策伯克多爾濟列傳

策伯克多爾濟土爾扈特人扎薩克卓哩克圖汗渥巴錫族子曾祖袞扎布為阿玉奇汗子生敦羅卜旺佈子五長噶勒丹諾爾布餘無嗣或留牧額

濟勒河故不著噶勒丹諾爾布子三長即策伯克
多爾濟次奇哩布襲策伯克多爾濟所遺扎薩克
次阿克薩哈勒別授扎薩克台吉自有傳乾隆三
十六年策伯克多爾濟從渥巴錫來歸入

覲

詔封和碩親王

賜號布延圖授扎薩克

賞三眼孔雀翎黃馬褂及

御厩馬黃轡尋

遣歸三十七年

賜收和博克薩哩四十年以年班入

覲先是策伯克多爾濟獻金削刀及色爾克斯所產馬

色爾克斯者洪豁爾屬部也策伯克多爾濟得其

馬以獻

詔育上駟院

駕幸木蘭行圍

御之果良驥

賜名曰寶吉騶列

御廐八駿之一至是復獻祖阿玉奇所服剛甲蓋世守

物也

上嘉其誠後先所獻物各

製詩紀之是年定和博克薩哩牧為舊土爾扈特部北

路以策伯克多爾濟領之

詔授盟長

賜扎薩克及盟長印四十三年卒弟奇哩布襲扎薩克
親王其子恭格車凌別授公品級扎薩克台吉自
有傳

一次襲奇哩布策伯克多爾濟弟乾隆三十六年
來歸授一等台吉四十年

詔授扎薩克轄北路右翼旗務兼副盟長四十四年襲
扎薩克和碩布延圖親王

詔授盟長其右翼扎薩克停襲四十六年冬哈薩克牧

雪甚馬羣逸入土爾扈特境者二百餘奇哩布屬
羅卜藏占巴等獲之匿不報哈薩克居伊犁北境
先是以所部地寒乞冬時牧馬南近伊犁

允之

詔司事者徵牧馬百取一至是奇哩布察所屬獲馬狀
治匿者罪遣使告守汛侍衛以逸馬歸哈薩克斃
者償之四十七年駐塔爾巴哈台大臣惠齡疏

聞

諭嘉其守法奉公

賜幣獎之四十八年

詔世襲罔替四十九年卒子車凌烏巴什襲

二次襲車凌烏巴什奇哩布長子乾隆四十九年

襲扎薩克和碩布延圖親王

公品級扎薩克一等台吉恭格車凌列傳

恭格車凌土爾扈特人扎薩克和碩布延圖親王
策伯克多爾濟子初授公品級一等台吉乾隆五

十年

詔授扎薩克先是舊土爾扈特部北路設扎薩克三以策伯克多爾濟弟奇哩布領其一

賜轄右翼扎薩克印後策伯克多爾濟卒子恭格車凌幼

詔奇哩布襲扎薩克親王爵納右翼扎薩克印毀之至是

詔恭格車凌轄策伯克多爾濟屬別鑄舊土爾扈特北

路右翼扎薩克印

賜之北路復為三扎薩克

扎薩克一等台吉阿克薩哈勒列傳

阿克薩哈勒土爾扈特人扎薩克卓哩克圖汗渥
巴錫族子親王策伯克多爾濟及奇哩布弟乾隆
三十六年從渥巴錫來歸

詔授一等台吉四十年

詔轄北路左翼旗務授扎薩克

賜之印四十四年授副盟長四十八年

詔世襲罔替

欽定外藩蒙古回部王公表傳卷之一百二

欽定四庫全書

欽定外藩蒙古回部王公表傳卷之一百三

傳第八十七

扎薩克多羅畢錫呼勒圖郡王巴木巴爾列傳

巴木巴爾土爾扈特人扎薩克卓哩克圖汗渥巴錫族弟曾祖納扎爾瑪穆特為阿玉奇汗從弟子四長多爾濟次恭格次阿喇布珠爾次烏巴什多爾濟生羅卜藏子三長即巴木巴爾次葉木沁其

裔別為一扎薩克見貝子奇布騰傳次旺丹授扎薩克固山貝子未入

覲而卒無嗣停襲故不立傳阿喇布珠爾授固山貝子以先渥巴錫等內附不隸烏訥恩蘇珠克圖盟別有傳雍正九年多爾濟遣使奏請赴唐古特禮達賴喇嘛

許之比歸得

優賚乾隆三十六年巴木巴爾從渥巴錫來歸抵伊犁巴

木巴爾及長子車凌德勒克皆疾次子達木拜扎爾桑入

覲

行在奏臣父巴木巴爾語臣臣曾祖多爾濟遣使入貢赴藏歸收誦

天朝恩示

頒賜物臣曾祖稽首受謂臣祖羅卜藏曰我等遠夷蒙恩若此盍內附因挈屬行次策木河哈薩克兵驟至懼不

敢進仍歸額濟勒河今蒙

如天之福臣等得為僕屬恨不令臣曾祖多爾濟臣祖
羅卜藏見之臣父巴木巴爾臣兄車凌德勒克又
以疾不獲就道故遣臣至臣父疾愈當趨

覲

上嘉其誠

詔封巴木巴爾為多羅郡王

賜號畢錫噶勒圖授扎薩克子車凌德勒克及達木拜扎

爾桑各授一等台吉復

優賜達木拜扎爾桑

尚方服物尋

遣歸三十七年

賜牧濟爾哈朗巴木巴爾尋入

覲

賞三眼孔雀翎珊瑚朝珠黃馬褂及章服佩飾銀幣鞍
馬諸物先是渥巴錫挈諸台吉入

觀

命工圖其形巴木巴爾繼至

詔如之將歸收復請遣喇嘛沙喇布等赴唐古特禮達
賴喇嘛

允之三十九年巴木巴爾卒子車凌德勒克襲

一次襲車凌德勒克巴木巴爾長子乾隆三十九
年襲扎薩克多羅畢錫呼勒圖郡王四十年入

觀道疾

遣醫視之愈馳至

命乾清門行走

賞三眼孔雀翎餘悉如

賜其父巴木巴爾物四十年定濟爾哈朗牧為舊土爾

扈特部東路以車凌德勒克轄右翼旗務

詔授盟長

賜扎薩克及盟長印四十四年聞班禪額爾德尼將以

祝

釐人

覲奏請詣

京師瞻禮

允所請四十八年

詔世襲罔替

扎薩克固山伊特格勒貝子奇布騰列傳

奇布騰土爾扈特人扎薩克卓哩克圖汗渥巴錫族子父業木沁為郡王巴木巴爾弟早卒子一即

奇布騰乾隆三十六年從渥巴錫來歸

詔封扎薩克固山貝子

賜號伊特格勒授扎薩克三十七年

賜牧濟爾哈朗四十年

詔授盟長轄東路左翼旗務

賜扎薩克印四十四年以年班入

覲

賜雙眼孔雀翎及章服佩飾銀幣鞍馬諸物四十八年

詔世襲罔替

扎薩克多羅濟爾哈朗貝勒默們圖列傳

默們圖土爾扈特人扎薩克卓哩克圖汗渥巴錫
族叔父其五世祖曰羅卜藏諾顏有子二長多爾濟
無嗣次噶勒達瑪子二長巴巴蘭無嗣次巴勒布
子四長巴雅斯瑚朗圖次納爾瑪次策稜棟魯布
皆無嗣次敦多克子一即默們圖順治十四年羅
卜藏諾顏遣使貢駝馬嗣以俄羅斯道阻不至乾

隆三十六年默們圖從渥巴錫來歸入

覲

詔封多羅貝勒

賜號濟爾哈朗授扎薩克

賞雙眼孔雀翎黃馬褂及

御厯馬紫轡尋

遣歸三十七年

賜牧晶河四十年定所牧地為舊土爾扈特部西路

金史卷一百三
卷一百三
詔授盟長

賜扎薩克及盟長印不設副盟長蓋東南北三路凡扎薩克八皆書庫爾岱青裔惟西路為羅卜藏諾顏裔以乏從衆故僅設扎薩克一四十八年

詔世襲罔替

欽定外藩蒙古回部王公表傳卷之一百三

欽定四庫全書

欽定外藩蒙古回部王公表傳卷之一百四

傳第八十八

扎薩克多羅弼哩克圖郡王舍稜列傳

舍稜土爾扈特人其五世祖曰額濟內泰什見總
傳額濟內泰什子二長塔巴克次扎薩克圖塔巴
克裔皆留牧額濟勒河故不著扎薩克圖子丹津
陀音丹津陀音子陀察陀察子五長阿哥木子烏

朗海授二等台吉濟納木授四等台吉次察罕伯克生勞章扎布子伊班授一等台吉次扎曼生巴圖爾烏巴什子沙喇扣肯授扎薩克固山貝子別有傳次扎噶察子即舍稜次車琳禪子德勒德什授一等台吉初土爾扈特族皆游牧額濟勒河與準噶爾絕舍稜諸昆弟獨附牧伊犁境為準噶爾屬台吉大軍征準噶爾達瓦齊就擒舍稜不即降阿睦爾撒納叛我師分道馳勦舍稜復乘間竄阿

睦爾撒納走死其從逆之敦多克布庫察罕等復
附舍稜匿庫克烏蘇喀喇塔拉境乾隆二十三年
詔定邊將軍成衮扎布右副將軍兆惠等馳勦舍稜竄
博羅塔拉道遇哈薩克游騎與交兵聞大軍逼馳
走道圖托羅海將為奔俄羅斯計先使往哈薩克
要而殺之舍稜復間道赴阿固爾阿爾海副都統
唐喀祿偕厄魯特散秩大臣和碩齊以兵尾抵布
古什河源有巴爾呼卒都圖者射舍稜從弟勞章

扎布仆擒之舍稜詭服罪請釋其弟乃降唐喀祿
曰是不可信將以兵擒舍稜和碩齊曰擒之無益不
若招使降釋勞章扎布歸越日舍稜遣三宰桑至
軍約往受降唐喀祿愈疑之和碩齊曰彼畏我軍
威故不敢至盍莅撫強唐喀祿行策馬渡河邇舍
稜營令從者皆下馬解橐韃舍稜遣使以酒至和
碩齊飲之急起入舍稜營唐喀祿立而待適時和
碩齊不返舍稜遣賊衆二千詭携駝馬迎我軍甫

次河岸輒旋擊營中賊悉起唐喀祿死之和碩齊
易服入賊隊後就擒論罪誅舍稜馳踰喀喇瑪嶺
遣使俄羅斯為所禁間道赴土爾扈特俄羅斯羈
諸森博羅特圖喇

詔遣兵擊之未至俄羅斯徙入其境初我使與俄羅斯
定議不納逋逃人至是

諭理藩院檄俄羅斯以舍稜獻舍稜懼由俄羅斯歸土
爾扈特牧三十六年其汗渥巴錫等來歸舍稜從

之抵伊犁境廷臣議舍稜負罪竄不可信且即以身至當追論前罪不宜與諸台吉同納降

上以舍稜既棄俄羅斯而至必不敢為難若拒之將窮無所歸且新降諸台吉或滋疑俟來朝執而罪之非所以示信遠人

詔理藩院以舍稜來歸故檄俄羅斯知之舍稜從渥巴錫等馳

覲

行在稽首請罪

宥之尋定諸台吉爵封舍稜為多羅郡王

賜號弼里克圖授扎薩克

賞三眼孔雀翎黃馬褂及

御厯馬紫轡定所部為青色特啟勒圖新土爾扈特設

扎薩克二

詔舍稜領其一子策伯克多爾濟授一等台吉先是杜

爾伯特台吉車凌烏巴什游牧額爾齊斯與舍稜

識比來歸授扎薩克親王爵至是以年班入

覲扈

蹕木蘭行圍舍稜見之握手歡語移時誓世為

天朝臣僕尋

遣歸三十七年

賜牧布勒罕河三十八年

詔授新土爾扈特盟長轄左翼旗務

賜扎薩克及盟長印四十八年

詔世襲罔替四十九年有內地奸民劉通等集衆千餘
赴瑚圖斯拉私開金礦且賂舍稜屬額爾齊斯雅
拉拜等給駝馬為助烏魯木齊都統海祿聞之以
兵往檄所部助弋奸民悉就擒

上以瑚圖斯拉逼舍稜收

詔封禁永為令

扎薩克固山烏察喇勒圖貝子沙喇扣肯列傳

沙喇扣肯土爾扈特人扎薩克多羅弼哩克圖郡

王舍拔從子父巴圖爾烏巴什為準噶爾台吉噶爾丹策凌壻初附牧伊犁境乾隆二十年大軍定準噶爾巴圖爾烏巴什乞降稱達瓦齊奪其屬以予準噶爾諸宰桑定北將軍班第將察給之會阿睦爾撒納叛巴圖爾烏巴什詭言以兵赴博囉塔拉助大軍勦逆不果往二十一年阿睦爾撒納為大軍所迫竄哈薩克巴圖爾烏巴什覬據伊犁轄四衛拉特聞我師有備竄察罕烏蘇博囉布爾噶

蘇阿勒坦特卜什勒卜什沙爾海諸境謀追軍至
輒逸仍乘間游騎掠巴爾達穆特塔本集賽諸鄂
拓克二十二年阿睦爾撒納走死俄羅斯逆黨綽
和爾烏喇特昂吉岱等復附巴圖爾烏巴什竄伏
沙拉伯勒二十三年

詔定邊將軍成袞扎布等馳勦巴圖爾烏巴什竄哈薩
克以病痘死沙喇扣肯從其叔父舍稜竄俄羅斯
尋歸牧額濟勒河三十六年汗渥巴錫偕舍稜等

來歸沙喇扣肯從至入

觀

詔封固山貝子

賜號烏察喇勒圖授扎薩克

賞雙眼孔雀翎黃馬褂及

御厯馬紫轡其屬台吉德爾德什伊班等各授一等台

吉尋

遣歸三十七年

詔與舍稜同牧三十八年

詔授新土爾扈特副盟長轄右翼旗務

賜扎薩克印沙喇扣肯尋偕年班台吉等入

覲獻白鷹

御製詩紀之四十年來朝扈

蹕木蘭行圍次額爾袞溝蒙古謂寬為額爾袞其地敞
故舊名曰額爾袞溝每歲蒙古扎薩克等扈

駕至此輒進宴陳詐馬什榜諸戲時大軍勦促浸逆番

克賊巢勒烏圍捷奏至沙喇扣肯等將進宴集和
門外舞蹈稱慶

詔以額爾袞巴雅爾滿名其地蒙古謂喜為巴雅爾誌
慶也四十八年

詔世襲罔替

欽定外藩蒙古回部王公表傳卷之一百四

欽定四庫全書

欽定外藩蒙古回部王公表傳卷之一百五

傳第八十九

和碩特部總傳

和碩特部舊為四衛拉特之一系出元太祖弟哈布圖哈薩爾有博貝密爾咱者始稱汗子哈尼諾顏洪果爾嗣之有子六牧青海西套伊犁諸境詳青海厄魯特部傳其第三子昆都倫烏巴什第四

子圖魯拜琥裔蕃衍圖魯拜琥號顧實汗其裔或
稱青海厄魯特設扎薩克二十有一或稱阿拉善
厄魯特設扎薩克一或隸察哈爾旗設爵三皆不
著和碩特部號昆都倫烏巴什號都爾格齊諾顏
子十六長邁瑪達賴烏巴什次烏巴什琿台吉次
多爾濟次額爾克岱青鄂克綽特布次第巴卓哩
克圖次噶布楚諾顏次蒙固次青巴圖爾次哈喇
庫濟次羅卜藏達什次塔爾巴次色稜次朋素克

今和碩特設扎薩克四皆多爾濟及額爾克岱青
鄂克綽特布裔崇德七年昆都倫烏巴什遣索諾
木從達賴喇嘛使貢駝馬

賜布幣及朝鮮貢物順治八年貢所產馬及黑狐皮九年
復貢駝馬嗣數遣使至康熙十六年邁瑪達賴烏
巴什子丹津琿台吉遣達爾漢宰桑入貢二十一
年復遣杭勒岱等至諸昆弟遣使從凡六百餘人
二十四年定四衛拉特貢例使入關以二百人為

額

諭所部知之詳杜爾伯特部傳時準噶爾稍強和碩特族
懼其威咸奉令後噶爾丹亂定顧實汗諸子姓游
牧青海者咸內附噶爾丹從子策妄阿喇布坦逼
和碩特族與同處表請青海復舊業如噶爾丹時
將陰謀為已屬

上燭其奸

諭責之令遣和碩特歸舊牧勿私據不從有羅卜藏車凌

者多爾濟曾孫也策妄阿喇布坦以女妻之雍正
八年靖邊大將軍傅爾丹屯科布多將擊準噶爾
或告曰噶爾丹策凌以兵萬授羅卜藏車凌遣禦
哈薩克設汎阿里瑪圖沙拉伯勒境羅卜藏車凌
棄之率戶三千餘由噶斯走青海將內附噶爾丹
策凌遣宰桑烏喇特巴哈曼集等追之為所敗復
遣喀喇沁宰桑都噶爾往襲不之及也傅爾丹以

聞

詔副都統達鼐偵防噶斯路俟羅卜藏車凌降遣入

覲以兵監從衆置內汛勿墮詭降計久之羅卜藏車凌不

至乾隆二十年大軍征達瓦齊抵伊犁有善披嶺

集賽之得木齊蘇克都爾格齊霍什哈及古里特

鄂拓克之得木齊和通喀喇博羅莽鼐伊什克特

咱瑪博勒等告舊為羅卜藏車凌屬獻籍六百餘

戶羅卜藏車凌子曰諾爾布敦多克游牧額琳哈

畢爾噶遣長子鄂齊爾馳降定北將軍班第遣招

其族台吉三濟特聞之獻籍三百戶丹津琿台吉
子曰阿喇布坦有子二長噶勒丹敦多布生沙克
都爾曼濟次敦多布車凌生明噶特達瓦齊善沙
克都爾曼濟倚任之小策凌敦多卜孫訥默庫濟
爾噶爾與達瓦齊搆兵沙克都爾曼濟擊之殲其
孥班第等至達瓦齊竄格登沙克都爾曼濟乃降
有班珠爾者顧實汗裔也與輝特阿睦爾撒納異
父同母陰比之前避達瓦齊亂來歸授多羅郡王

詔侯厄魯特定將以為和碩特汗時從大軍抵伊犁私
奪諾爾布敦多克沙克都爾曼濟諸台吉屬產班
第禁之乃稍戢尋定入

覲次以沙克都爾曼濟及班珠爾列初班三濟特鄂齊
爾次之阿睦爾撒納阻其行詭稱沙克都爾曼濟
將叛迎達瓦齊請以班珠爾屯特穆爾圖諾爾護
降衆班第斥詞妄班珠爾詭入

覲赴塔密爾收取阿睦爾撒納孥謀偕遁叅贊大臣阿

蘭泰擒之沙克都爾曼濟入

覲避暑山莊

上御澹泊敬誠殿受朝

詔封和碩特汗授盟長

諭董所屬勤教養圖生聚三濟特鄂齊爾繼至

詔授三濟特扎薩克一等台吉鄂齊爾間散一等台吉

遣歸牧定西將軍策楞將以大兵勦阿睦爾撒納

詔沙克都爾曼濟往會甫就道諜者以阿睦爾撒納據

伊犁告

諭遣親信宰桑馳諭所部備兵勿為逆煽而以身從大
軍擊賊班珠爾械至禁獄所請遣三濟特鄂齊爾
書令和碩特族衆分勦阿逆三濟特既得書言諾
爾布敦多克沙克都爾曼濟皆隣牧且族台吉瑪
尼巴圖巴蘇泰瑪賚烏巴什弩庫特圖魯孟克阿
穆爾弩斯海薩望等皆無異志當以書遺之鄂齊
爾稱願歸告父共勦逆而我副將軍薩拉爾集伊

犁宰桑等定議約諾爾布敦多克及沙克都爾曼
濟子圖捫以兵至博囉塔拉布爾哈蘇台闡勒奇
嶺勒阿睦爾撒納諾爾布敦多克圖捫各遣使至
巴里坤告故諾爾布敦多克表曰臣父羅卜藏車
凌前噶爾丹策凌時謀內附不獲間大軍征達瓦
齊臣族班珠爾倚阿睦爾撒納奪臣屬臣願奮志勒
賊

上嘉其誠

詔封公爵以班珠爾所奪給之班珠爾尋伏誅二十一年諾爾布敦多克來歸薩拉爾等既定謀阿睦爾撒納偵知之先備諾爾布敦多克以兵擊諸伊犁之諾爾斯哈濟拜姓不勝偕薩拉爾間道行由珠勒都斯至巴里坤時沙克都爾曼濟抵策楞軍

詔令遺書其子圖捫以兵護牧書未達明噶特附阿睦爾撒納叛脅所部衆圖捫不之從挈戚屬抵珠勒都斯請內徙

上憫之

詔封多羅貝勒

賜銀千兩

賞雙眼孔雀翎

諭由額琳哈畢爾噶往會沙克都爾曼濟有圖什墨勒

厄爾錐音者從大軍勦阿睦爾撒納中道強取諾

爾布敦多克屬

詔責之察所取以歸諾爾布敦多克及子鄂齊爾尋相繼

卒

詔以鄂齊爾弟博爾和津襲公爵

諭曰諾爾布敦多克舊牧與哈薩克接壤恐或掠之若
欲徙歸額琳哈畢爾噶惟其便沙克都爾曼濟携子
圖捫及博爾和津等由珠勒都斯至巴里坤乞屯
牧近地副都統雅爾哈善以

聞

諭曰沙克都爾曼濟以舊牧乏生計跋涉遠至殊堪憫

惻準噶爾頻年不靖諸部生計維艱然使台吉等各收其屬安處游牧以耕畜為業善自謀生不數年間可復舊業今沙克都爾曼濟等雖暫處巴里坤究非故土難以久處又喀爾喀附近之和碩特杜爾伯特輝特等俱將遣歸舊牧且諭令各安生業嚴戢盜賊沙克都爾曼濟等自宜仍歸舊牧但甫從遠道至遽令之歸不免困頓可令暫處巴里坤附近地賞給糧米如戶口數復

遣使諭沙克都爾曼濟及綽羅斯汗噶爾藏多爾濟輝特汗巴雅爾曰爾等自入覲歸牧後遵朕諭旨約束所屬守分安居已踰一載甚勞遠念今特遣官存問并令齎賜食物佩飾以示優眷逆賊阿睦爾撒納現竄匿哈薩克苟延殘喘朕遣官兵征勦經年時屆寒冬暫行撤還第逆賊狡詐百出倘遣人赴爾等游牧詭計煽惑爾等即行擒獻至沙克都爾曼濟奏請游牧巴里坤附近地已諭酌賜口糧俟明春復賞給籽

種耕耨庚集額卜齊布拉克地秋收後遣歸舊牧爾等其善自謀生永享昇平之福沙克都爾曼濟尋獻所部盜馬者請論罪

諭曰厄魯特劫奪成風不可不嚴加懲創爾等擒獲竊賊解送內地甚屬恭順嗣後可自治之復以博爾和津幼不更事

諭沙克都爾曼濟留心護視并令其族摩羅及宰桑新登等暫理牧務既而諸衛拉特復不靖巴雅爾詭

稱沙克都爾曼濟掠所部牧將以兵襲巴里坤噶
爾藏多爾濟及兄子扎納噶爾布叛擾邊境有普
爾普者以其主沙克都爾曼濟私通扎納噶爾布
告

詔雅爾哈善察之時沙克都爾曼濟設汛哨內禦遣謀
赴巴里坤偵大軍狀子圖捫死不以告雅爾哈善
名之稱病不至疑果叛宵抵其營殲之斬衆四千
餘察獲博爾和津奏請安置地

詔徙京師傳襲公爵沙克都爾曼濟弟桑濟竄徙額爾
齊斯境掠奉使杜爾伯特之侍衛佛保駝馬佛保
奮擊之乃逸杜爾伯特汗車凌遣親王車凌烏巴
什等追勦桑濟走死和碩特叛黨始靖而其族有
偕土爾扈特部游牧俄羅斯之額濟勒河境者三
十六年從土爾扈特汗渥巴錫自俄羅斯來歸尋
入

覲

詔封貝勒貝子台吉爵各有差

賜盟名曰巴圖色特啟勒圖設扎薩克四餘悉如土爾

扈特例三十七年

賜牧珠勒都斯四十年設正副盟長各一所部旗四爵
如之扎薩克土謝圖貝勒一扎薩克阿穆爾哈貴
貝子一扎薩克一等台吉二

欽定外藩蒙古回部王公表傳卷之一百五

欽定四庫全書

欽定外藩蒙古回部王公表傳卷之一百六

傳第九十

扎薩克多羅土謝圖貝勒恭格列傳

恭格和碩特人姓博爾濟吉特元太祖弟哈布圖
哈薩爾之二十四世孫其高祖多爾濟為昆都倫
烏巴什第三子有子四曰托羅什瑚曰察袞曰額
布根曰阿海長次不可考托羅什瑚子四長楚貴

次端多克次瑪爾噶斯次塔爾巴車凌楚貴子二
長特克圖克齊次之特克子一曰薩爾哈克圖克
齊子二長根敦諾爾布子騰特克授一等台吉次
即恭格端多克裔別設扎薩克一見一等台吉諾
海傳塔爾巴車凌裔別設扎薩克一見一等台吉
巴雅爾拉瑚傳額布根裔博克版授一等台吉阿
海裔博爾和津附內蒙古旗不列藩部見總傳餘
皆絕嗣或留牧俄羅斯之額濟勒河故不著和碩

特族未詳自何時徙俄羅斯境乾隆三十六年恭
格兄根敦諾爾布從土爾扈特汗渥巴錫自俄羅
斯携衆來歸根敦諾爾布道卒恭格自伊犁入
覲

上幸木蘭次伊綿峪甫合圍恭格至

召入

覲以蒙古語垂詢之

賜章服釋行衣

賞雙眼孔雀翎黃馬褂及

御厩馬紫轡扈

蹕行圍每日大官授餐尋

賜宴

避暑山莊

賚白金文綺雕鞍橐鞬諸物

命工圖其形

詔封多羅貝勒

賜號土謝圖授扎薩克尋

遣歸三十八年卒子德勒克烏巴什襲

一次襲德勒克烏巴什恭格長子乾隆三十八年

襲扎薩克多羅土謝圖貝勒四十年

詔授盟長轄所部衆

賜扎薩克及盟長印四十八年

詔世襲罔替

扎薩克固山阿穆爾聆貴貝子雅蘭丕勒列傳

雅蘭丕勒和碩特人姓博爾濟吉特扎薩克多羅
土謝圖貝勒恭格族祖其曾祖額爾克岱青鄂克
綽特布為昆都倫烏巴什第四子有子二長察罕
次塔爾巴察罕子三濟拉什有子二長即雅蘭丕
勒次噶勒丹諾爾布早死乾隆三十六年雅蘭丕
勒從土爾扈特汗渥巴錫自俄羅斯來歸入

覲

詔封固山貝子

賜號阿穆爾喀貴授扎薩克

賞御厰馬紫轡餘悉視恭格時噶勒丹諾爾布子巴特瑪阿玉什及塔爾巴裔巴布勒達克賽音扣肯等從至

詔授巴特瑪二等台吉阿玉什及巴布勒達克賽音扣肯各授四等台吉以扎薩克領之雅蘭丕勒請捐妻孥為喇嘛從章嘉呼圖克圖皈依釋典

允之

詔授扎薩克喇嘛子布顏楚克襲扎薩克貝子

一次襲布顏楚克雅蘭丕勒長子乾隆三十六年

襲扎薩克固山阿穆爾哈貴貝子

賜雙眼孔雀翎黃馬褂四十年

詔授副盟長轄中路旗務

賜扎薩克印四十八年

詔世襲罔替

扎薩克一等台吉諾海列傳

諾海和碩特人姓博爾濟吉特扎薩克多羅土謝
圖貝勒恭格族叔父祖端多克子一曰恭克拜爾
珠爾早卒子即諾海乾隆三十六年從土爾扈特
汗渥巴錫自俄羅斯來歸

詔授扎薩克一等台吉四十年

詔轄右翼旗務

賜扎薩克印四十八年

詔世襲罔替

一等台吉巴雅爾拉瑚列傳

今授扎薩克

巴雅爾拉瑚和碩特人姓博爾濟吉特扎薩克多
羅土謝圖貝勒恭格族叔父祖塔爾巴車凌子二
長莽果特次色爾博特莽果特嗣絕色爾博特子
一即巴雅爾拉瑚乾隆三十六年從土爾扈特渥
巴錫自俄羅斯來歸

詔授一等台吉尋卒子齊業齊襲後授扎薩克

一次襲齊業齊巴雅爾拉瑚長子乾隆三十六年

襲一等台吉四十年

詔授扎薩克轄左翼旗務

賜之印四十八年

詔世襲罔替

欽定外藩蒙古回部王公表傳卷之一百六

欽定四庫全書

欽定外藩蒙古回部王公表傳卷之一百七

傳第九十一

哈密回部總傳

哈密回部在嘉峪關外至

京師七千一百八十里東界喀爾喀西界吐魯番南
至沙磧北至天山界巴里坤邑十有三曰蘇們哈
爾輝曰阿思塔納曰托和齊曰拉卜楚喀曰喀喇

都伯曰格子烟墩曰星星峽曰下莫艾曰上莫艾
曰塔勒納沁曰半池泉曰柳樹泉曰博囉特口皆哈
密屬漢為伊吾廬地唐宋稱伊州元始稱哈密
如之其地皆纏頭回種今設扎薩克領之回人錯
居西域以天方為祖國或城郭處或逐水草徙稱
花門種相傳祖瑪哈麻教以事天為本重殺不食
犬豕肉嘗以白布蒙頭故稱曰纏頭回又稱白帽
回回人自呼白帽曰達斯塔爾別有紅帽回輝和

爾哈拉回諸族然以纏頭回為著扎薩克居哈密
舊城戶十設甲長一別置官兵七百屯哈密新城
及塔勒納沁以駐防大臣領之順治四年甘肅巡
撫張尚奏哈密衛輝和爾都督及齊勒蒙古衛都
督永柱等明入貢值寇掠敕印羈肅州今赴臣所
乞糧願効忠

天朝

詔納之六年河西逆回丁國棟等煽哈密及吐魯番部掠

內地民偽立哈密巴拜汗子土倫泰為王據肅州
叛集纏頭回紅帽回輝和爾哈拉回漢回等數千
分置都督大軍討之抵肅州擊斬哈密頭目塔什
蘭及纏頭漢回四百餘級以雲梯夜薄城奪門入
斬土倫泰及纏頭漢回二千餘賊壘垣拒墮之擒
丁國棟斬哈密偽都督和卓哈資纏頭回偽都督
琥伯峯哈拉回偽都督茂什爾瑪密輝和爾偽都
督瑞瑚哩偽左都督帖密卜喇紅帽回偽右都督

恩克特默等八年回目克拜至嘉峪關稱哈密使
請通貢甘肅提督張勇責盡歸內地民乃可十二
年克拜復齎葉爾羌表至稱哈密巴拜汗為葉爾
羌阿布都喇汗所禁獻內地民請罪

詔納之康熙十八年張勇謀噶爾丹襲哈密以

聞

詔設備邊汛噶爾丹懼不至尋與兄子策妄阿喇布坦修
怨策妄阿喇布坦牧博囉塔拉噶爾丹牧阿爾台

哈密居其間畏準噶爾威強事之三十二年

遣使博囉塔拉道哈密為噶爾丹屬所戕

上以哈密鄰塞境賊乘虛警或不及備

詔昭武將軍郎坦屯甘肅會軍所擒纏頭回卒以噶爾丹
徒科布多三遣使乞糧哈密告郎坦請剿噶爾丹
及哈密

遣護軍統領蘇丹等往議尋奏郎坦議大軍屯甘肅噶爾
丹必不敢越哈密若聽耕牧久將為邊患應於年

內運糧至嘉峪關來春設站固壘酌留兵哈密以
大軍進科布多倘噶爾丹由科布多遁大軍歸哈
密取禾平城絕隄噶爾所恃產蘇丹等議噶爾丹無
定牧大軍趨科布多或不值哈密隸噶爾丹久遠
剿之非所以體

好生仁請釋回卒歸給糧騎檄所部知

朝廷德意

詔如蘇丹等議三十五年噶爾丹為大軍敗遁集所私議

取糧哈密副都統阿南達設哨布隆吉爾巴里坤
塔勒納沁都爾博勒津諸路值哈密達爾漢伯克
額貝都拉使奉降表至嘉峪關遣告所部曰噶爾
丹若竄爾境其擒獻否則以告倘私給噶爾丹糧
騎或助之他適爾降表不足信矣噶爾丹以虛哈
密故懼襲已且聞大軍嚴備不果赴三十六年哈
密俘噶爾丹子色布騰巴爾珠爾及其屬以獻噶
爾丹尋自殺額貝都拉表請

頒敕印

賜旗纛令吐魯番葉爾羌聞之皆知榮矢世保疆圉復以
哈密民酌置肅州為朝覲往來便貢使至肅州令
得乘驛入都

上念哈密內附誠

詔以額貝都拉轄之給扎薩克

敕印

賜紅纛子郭帕伯克率所部百人屯肅州貢使乘驛額十

五人三十七年

遣官赴哈密編旗隊設管旗章京副管旗章京叅佐領驍
騎校各員肅州別設佐領一復以哈密市甘肅便
詔勿禁三十九年所部偵哈薩克布魯特讐策妄阿喇布
坦將興兵爭喀什噶爾以告

詔不時偵奏而策妄阿喇布坦憾哈密擒獻噶爾丹子故
掠其屬赴市吐魯番者

詔責策妄阿喇布坦罪準噶爾怨哈密甚五十四年遣兵

二千襲哈密掠北塞五抵城我駐防兵二百率回
卒奮擊斬九十級擒三人賊退屯城南聞肅州援
至遁

頒賜銀萬五千及粟米牛羊贍哈密衆有佐領色拍爾者
俘獻準噶爾賊以秋將復襲告

獎賜章服銀幣

諭曰哈密編設佐領無異內地安可置之不問

遣大軍屯巴里坤防禦準噶爾復

詔運糧貯哈密以肅州佐領為導五十五年富寧安奏哈密屬之布魯爾圖古哩克接壤地并巴里坤都爾博勒津哈拉烏蘇及西吉木達里圖布隆吉爾附近之上浦下浦等處地可耕請募民興屯

上可其奏五十八年奏巴里坤至哈密站舊各設馬準噶爾使及降人至乘巴里坤站馬至哈密又自哈密扎薩克所撥馬送布隆吉爾今歸附者衆馬不給請於巴里坤站增馬五十哈密站增馬八十從之

六十一年議興屯吐魯番遣哈密回民助役雍正
三年撤大軍還四年王大臣等議駐防哈密兵止
五百準噶爾賊或乘間盜駝馬請撥安西鎮標兵
五百往仍留嘉峪關至哈密軍站備不虞

詔如議理藩院奏哈密來朝廩給限四旬叅佐領等給緞
布有差從之七年大軍復屯巴里坤議墾哈密及
塔勒納沁地八年獲麥青稞六千四百石嗣歲給
穀種五百石秋納糧五千石每石給銀一兩九年

寧遠大將軍岳鍾琪謀哈密屬漏師準噶爾且導掠巴里坤駝馬以告

諭曰哈密雖不可信然亦當諒其苦情久遭準噶爾凌虐恨之入骨畏之如虎或偶通信於賊不過為將來自全計我軍固不可不加意隄防然亦不可使有疑懼心大軍力能庇護哈密自不為賊所用矣十年噶爾丹策凌遣將色布騰車稜納木扎勒等由烏克克嶺西喇呼魯蘇分兵襲哈密及塔勒納沁回衆拒之

乞援岳鍾琪軍鍾琪檄總兵曹勦趣輝魯圖達巴
罕五堡復慮賊由庫亥圖圖爾庫勒竄北山檄副
將軍石雲倬設伏巴罕恩度爾署鎮海將軍卓爾
設伏察罕春集副將軍常賚赴烏克克嶺截賊竄
路曹勦軍抵二堡遇賊五千餘奮擊之賊由烏克
克嶺赴塔呼納呼遁

諭曰哈密被賊侵擾回民并力抵禦甚屬可嘉聞其城外
牧放牲畜一時不及收回者被賊盜去雖據報賊遁後

仍將牲畜奪回但恐遺失倒斃者已多朕心深為軫念其遺失牲畜之頭目回民等著賞銀萬兩守城禦賊者著賞銀五千兩按口分給其擒獲賊人者優加賞賚務令均沾恩澤十一年護理寧遠大將軍印務張廣泗奏吐魯番回民內徙請置塔勒納沁地

諭曰塔勒納沁無屋居回民何以棲身朕思哈密地煖城外五堡等處為哈密回民舊駐地若將吐魯番回民暫行安置過冬令哈密扎薩克轉飭本地回民就近照視

似為有益哈密回民果能使之得所朕必將扎薩克及回民等優加重賞尋議從吐魯番回民置瓜州十二年所部獻可耕地之錯軍營屯田者

上以哈密皆國土且為纏頭回族世耕地不忍別置民人而其地錯官田不便聽兵民互耕

詔別給地畝銀兩及牛具穀種償之十三年撤大軍還王大臣等議設駐防哈密及巴里坤兵各二千陝西總督查郎阿奏哈密巴里坤路隔南山大坂兩地

各留兵二千聲息難驟通請簡兵三千屯哈密西
三堡沙棗泉東北塔勒納沁并有城堡各屯兵千
又哈密地熱不便牧馬請令每年播種後酌遣哈
密兵千沙棗泉塔勒納沁兵各五百放牧昭莫多
呼濟爾古沙山子鹿心山等處設汛烏爾圖哈達
伊克恩都爾鄂什希地防牧厥俟秋撤還又哈密
南山大坂為北路屏藩應分兵二百屯盤道設汛
鹿心山松樹塘烏蘭特爾木斯畢柳大坂等處烏

克克嶺為三堡沙棗泉要隘應分兵二百屯烏克
克嶺上堡設汛索大堡白楊溝羊堡錫喇諾爾等
處塔勒納沁河源為塔勒納沁小口應分兵二百
屯河源小堡設汛莫艾舒魯遜大坂等處別簡兵
五千屯齊勤靖逆柳溝布隆吉爾橋灣五處設汛
馬蓮井子東星星峽西互為守望從之乾隆元年
詔來年免納糧給種地回民銀萬兩六年大學士查郎
阿奏哈密駐防兵請屯塔勒納沁賽巴什達哩雅

三堡各三百哈密城千二百

詔允之七年署川陝總督馬蘭泰奏塔勒納沁非衝地
三堡為哈密要隘通準噶爾居五堡中請撤塔勒
納沁兵三百歸三堡從之十一年安西提督李繩
武奏哈密三堡西南錫喇諾爾通魯克沁及闢展
路舊設汛以乏水草議撤準噶爾或潛越其地請仍
設汛兵守望又已達什地為哈密扎薩克牧廠西
北二十餘里為畢柳大坂路通喀喇沙爾請設汛

令烏拉台巴達什聲息相通

詔廷議奏錫喇諾爾汎設官兵二回兵三畢柳大坂汎
設官兵三回兵二從之十三年以安置肅州金塔
寺之吐魯番回衆告饑

諭曰肅州金塔寺安置吐魯番回人有不服水土至生
計艱窘者百餘戶經大臣等議奏請徙哈密令種地
居此項回衆向被準噶爾凌虐願徙入內地迄今二
十餘年因水土異宜積蓄者少窘迫者多若將伊等

徙於他處究恐生計有損哈密吐魯番雖部落多殊
其教則一情性相宜且哈密貝子玉素卜自伊曾祖
額貝都拉達爾漢伯克以來數世受國恩澤竭誠報
効奮勉急公教養所屬之人亦甚妥協現在哈密地
方尚有可耕餘地著將安置金塔寺回衆交貝子玉
素卜併入伊所屬旗分佐領加意撫恤令新舊回衆
和睦如一給地耕種俾永久不致失所即以此諭扎
薩克貝子玉素卜知之十八年

諭曰哈密所屬賽巴什達哩雅等處屯田前給回人耕種所交穀石以四分交官六分給與回人今聞伊等生計稍艱著加恩將每年所獲穀石全行賞給不必交官二十年所部兵百從西路軍征達瓦齊伊犁定撤歸二十一年

諭曰哈密生齒日繁準噶爾全部底定哈密屬邑德都摩亥圖古哩克地不必復設汛哨其仍給回民為世業二十四年議撤駐防兵二千以靖逆衛兵二百瓜

州兵三百移置哈密黃墩營兵二百移置塔勒
納沁隸哈密副將轄所部旗一爵如之為郡王品
級扎薩克多羅貝勒由一等達爾漢晉襲



欽定外藩蒙古回部王公表傳卷之一百七